

Scolars da Basilea emprendan rumantsch

Ina iniziativa lantschada dal deputà socialdemocrat Linard Candreia en il parlament chantunal da Basilea-Chmapagna

DA MARTIN CABALZAR

■ **Malgrà ch'il rumantsch è la quarta lingua naziunala san blers Svizzers pauc da questa lingua. Quai duai ussa midar sco quai ch'in project da pilot en las scolas da Basilea-Champagna demonstrescha. L'idea per quest project ha il deputà socialdemocrat Linard Candreia lantschà cun success en il parlament chantunal da Basilea-Champagna.** L'intent principal è da sensibilisar ils scolars per la lingua e cultura rumantscha. Co quai duai succeder vegn laschè avert e stat en la cumpetenza dals magisters da la tschintgavla e sisavla classa primara e da l'emprima classa dal stgalim secundar.

Sustegn da la Lia Rumantscha

Il chantun Basilea-Champagna cooperecha en quest project da sensibilisaziun culturala e linguistica cun la Lia Rumantscha, l'uniun tetgala da la Rumantscha. Il chantun Basilea-Champagna presta cun quest project ina contribuziun essenziala per la confruntaziun da las scolaras e dals scolars da Basilea cun il quart linguatg naziunal. La Lia Rumantscha ha mess a disposiziun per quest project ina vasta elecziun da materialias d'instrucziun en lingua rumantscha ch'è vegnida messa disposiziun a las persunas d'instrucziun interessadas. Per che las scolaras ed ils scolars possian er evenimentar la lingua rumantscha en la stanza da scola ha la Lia Rumantscha recrutà magistras e magisters ch'intermedieschan als scolars e giuvenils da Basilea-Champagna in «kurs da crash», la lingua e cultura rumantscha e che sustegnan las persunas d'instrucziun



Scolast e deputà Linard Candreia, l'iniziant dal project da pilot a Basilea.

MAD

en lur lavur. Per questas persunas da support han ils iniziants pudì intermediar in sustegn finanziel tras il fond da lottaria

dal chantun Basilea-Champagna ed ina contribuziun finanziala da la Promoziun da cultura dal chantun Grischun.

Sguard enavos ed enavant

Gia la primavaira 2018 han gia quatter persunas d'instrucziun da la scola primara e dal stgalim superiur organisà cun lur classas singuls dis u er entiras emnas da projects. Tut ils participants han apprezzà grondamain il sustegn professiunal da la Lia Rumantscha e da magistras e magisters engaschads or dal Grischun. Per part èn ils projects da classa vegnids terminads cun in vadi en il chantun Grischun, pussibilitond uschia ina sentupada directa cun la lingua e cultura rumantscha. Da curt han l'Uffizi chantunal per la scola populara e la Lia Rumantscha organisà in inscunter d'infurmaziun ch'ha gi lieu a Liestal. En il medem mument è vegnì lantschà il project per l'onn da scola 2018/19 dal qual gia quatter ulteriusas persunas d'instrucziun prendan part.

La Lia Rumantscha ha grond plaschair dal project

La Lia Rumantscha ha grond plaschair ch'il project a Basilea-Champagna è in success. Il project da pilot promova en furma cumpacta ina avischinaziun cun la quarta lingua naziunala. Scolaras e scolars d'in conturn na-rumantsch vegnan sensibilisads per la lingua e cultura rumantscha. Quai po era motivar els dad imprendir autras linguas latinas sco franzos e talian. Il project a Basilea-Champagna ha character da model per ils auters chantuns svizzers. El correspunda a la finamira da la Lia Rumantscha che mintga scolara e mintga scolari en Svizra vegnia ina giada en contact cun il rumantsch durant il temp da scola.